



Na osnovu člana 20. Zakona o slobodi pristupa informacijama u Federaciji Bosne i Hercegovine (Sl. novine Federacije BiH 32/01), Uputstva za provođenje Zakona o slobodni pristupa informacijama u Federaciji BiH (Sl. novine Federacije BiH 57/01) i člana 40. Zakona o sudovima (Sl. novine kantona Sarajevo 21/01), predsjednik Općinskog suda u Sarajevu objavljuje

VODIČ

za pristup informacijama u Općinskom sudu u Sarajevu

Svakoj osobi (pravnoj i fizičkoj) omogućava se pristup informacijama koje su pod kontrolom Općinskog suda u Sarajevu, a koje su sadržane u Index-registru informacija, u skladu sa Zakonom o slobodi pristupa informacijama u Federaciji BiH.

II

Sjedište Općinskog suda u Sarajevu je u Sarajevu, ulica Šenoina broj 1, telefoni: 033/567-680, fax brojevi 033/208-993 i 033/227-148. Službenik za informisanje je stručni saradnik za informisanje i pružanje međunarodne pravne pomoći, soba 237/II, tel: 033/567-715.

Ovaj Vodič se može dobiti u Prijemnoj kancelariji, svakoj pisarnici i Upravi Općinskog suda u Sarajevu kao besplatan primjerak.

III

Pravo na pristup informaciji se ostvaruje:

- Podnošenjem pismenog zahtjeva na jednom od službenih jezika Federacije;
- U zahtjevu dati dovoljno podataka o prirodi ili sadržaju informacije koja se traži;
- U zahtjevu se obavezno navodi ime podnosioca zahtjeva i adresa;
- Zahtjev se predaje lično u prijemnu kancelariju Suda, soba broj 3 u prizemlju zgrade, ili poštom na adresu suda

Ako se zahtjev donosi na ličnu (osobnu) informaciju, zahtjev za pristup informaciji može podnijeti fizičko lice na koje se zahtjev odnosi, njegov zastupnik ili punomoćnik.

Osobe iz prethodnog stava svoj identitet potvrđuju prezentovanjem lične karte ili druge isprave sa fotografijom, dok zakonski zastupnik mora prezentovati i dokaz o zakonskom zastupanju, odnosno punomoćnik mora imati punomoć, kao i da prilože kopiju osobnog dokumenta podnosioca zahtjeva.

IV

Pravo pristupa informaciji može biti ograničeno u slučajevima:

- Interesa odbrane i sigurnosti, kao i zaštite javne sigurnosti;
- Sprječavanje kriminala i otkrivanje kriminala;
- Zaštita postupka donošenja odluka u Sudu uključujući davanje mišljenja, savjeta ili preporuka, bilo da se radi o osobi zaposlenoj u Sudu ili drugoj osobi koja je radom vezana za sud, s tim da to ne obuhvata činjenice, statističke, znanstvene ili tehničke informacije;
- Kada Sud osnovano utvrdi da zahtjev za pristup informaciji uključuje povjerljive komercijalne interese treće strane, bez odlaganja pismeno obavještava treću stranu o pojedinostima zahtjeva i upozorava da će se tražena informacija priopćiti ako u roku od 15 dana od dana prijema ovog obavještenja pismeno ne odgovori da smatra da je informacija povjerljiva i navede razloge zbog kojih bi njenim priopćavanjem mogla nastupiti šteta. Nakon prijema odgovara sud će utvrditi izuzetak od priopćavanja tražene informacije;
- Sud utvrđuje izuzetak od priopćavanja tražene informacije ako osnovano utvrdi da informacija uključuje lične (osobne) interese koji se odnose na privatnost treće osobe

V

Sud će priopćiti traženu informaciju bez obzira na izuzetke utvrđene zakonom ako je to opravdano javnim interesom. Pri tome uzima u obzir svaku korist i štetu koje mogu proisteci iz priopćavanja informacije.

Prilikom donošenja odluke je li priopćavanje informacije opravdano javnim interesom, sud razmatra okolnosti naročito uključujući:

Svako nepoštivanje zakonske obaveze, postojanje bilo kakvog prijestupa, nepravde, zloupotrebe vlasti ili nemara u obavljanju službene dužnosti, neovlaštenog korištenja javnih fondova, opasnosti po zdravlje ili sigurnosti pojedinca, javnosti ili okoline.

Ako se utvrdi da je priopćavanje tražene informacije podnosioca zahtjeva koju je sud utvrdio kao izuzetak u vezi sa povjerljivim komercijalnim informacijama i izuzetak u zaštiti privatnosti, u javnom interesu, sud će rješenjem obavijestiti treću stranu da će informaciju priopćiti po isteku roka od 15 dana od dana prijema tog rješenja. Na navedeno rješenje ima se pravo žalbe predsjedniku suda u roku od 15 dana, kao i pravo obraćanja Ombudsmenu Federacije BiH.

VI

Kada sud odobri pristup informaciji u cijelosti ili djelimično, rješenjem će obavijestiti podnosioca zahtjeva:

- O mogućnosti ličnog (osobnog) pristupa informaciji u prostorijama Suda, ili će podnosiocu zahtjeva dostaviti informacije u pisanoj formi, ako je informacija kraća od deset strana,
- O mogućnosti umnožavanja informacije ako je duža od deset strana, uz obavezu prethodno izvršene uplate.

Uplata naknade za umnožavanje informacije preko deset strana vrši se u iznosu od 0,50 KM po jednoj stranici, odnosno 5,00 KM po jednoj disketi.

VII

U slučaju kada službenik za informisanje donese rješenje kojim se odbija pristup informacijama, o tome će rješenjem obavijestiti podnosioca zahtjeva navodeći zakonski osnov za status izuzeća informacije, uključujući sva materijalna pitanja važna za donošenje rješenja kao i činitelje javnog interesa, te rok u kojem se protiv rješenja može podnijeti žalba predsjedniku Općinskog suda u Sarajevu, u skladu sa članom 11., stav 1. Zakona o upravnom postupku (Sl. novine Federacije BiH 2/98), kao i pouku o pravu obraćanja Ombudsmena Federacije BiH.

VIII

Rješenja iz tačke VI i VII dostavljaju se podnosiocima zahtjeva najkasnije u roku od 15 dana od dana podnošenja zahtjeva, osim u slučajevima kada je prethodno potrebno dobiti izjašnjenje treće strane o priopćavanju povjerljivih komercijalnih informacija, odnosno informacija koje se odnose na privatnost treće osobe.

IX

Ovim se ne ograničavaju prava i obaveze fizičkih i pravnih osoba koje se odnose na pristup informacijama u skladu sa zakonima o sudskim postupcima.